

Ag seo thíos aistriúchán samplach ar an téacs in Cleachtadh aistriúcháin 21. Níltear ag maíomh nach dtiocfadh aistriúchán níos fearr a dhéanamh ach seans go mbeadh sé ina chuidiú ag aistritheoirí a leagan féin a chur i gcomparáid leis an leagan seo.

Plean Gníomhaíochta Rehab

Tá plean nua scríofa ag Rehab. Insíonn an plean seo do dhaoine cad iad na rudaí a dhéanfaidh Rehab sna cúig bliana amach romhainn. Sa phlean seo, insítear do dhaoine cad iad na rudaí atá le hathrú agus cad iad na rudaí a bheidh mar an gcéanna. Chomh maith leis sin, insíonn an plean do dhaoine cad iad na rudaí a bhfuilimid ag iarraidh feabhas a chur orthu. Tá sé tábhachtach go mbeadh a fhios ag daoine go leanfaidh Rehab orainn ag soláthar na seirbhísí atá riachtanach dóibh, leithéidí seirbhísí lae, cóiríocht, oiliúint agus tacaíocht i dtaca le jabanna de. Beidh cúrsaí oiliúna agus tacaíocht do dhaoine a bhfuil post acu á dtairiscint ag Rehab i gcónaí, díreach mar atá anois, agus tacóimid le daoine sa dóigh go mbeidh siad in ann maireachtáil go neamhspleách. Is é bun agus barr an phlean seo ná conas is féidir le foireann Rehab obair lena chéile agus le daoine eile chun seirbhísí níos fearr fós a sholáthar agus roghanna nua a chur ar fáil. Is daoine a úsáideann ár gcuid seirbhísí, agus daoine atá ag obair le Rehab, a chuir na smaointe sa phlean seo ar fáil. Daoine atá ag obair le Rehab, agus Bord Ghrupa Rehab, a chuir eagar ar na smaointe sin. Anois, tá an plean á chur i láthair gach uile dhuine atá ag obair le Rehab. Tá an leagan seo, i nGaeilge shimplí shoiléir, á sheoladh amach chuig ár gcuid seirbhísí go léir chun go mbeidh deis ag daoine é a thabhairt abhaile leo agus é a roinnt le daoine eile.

Tá cáipéis nua scríofa ag Rehab a mhíníonn Misean, Fís agus Luachanna Rehab. Cuirfear an cháipéis seo ar fáil do gach uile dhuine agus beidh sé ar taispeáint inár gcuid ionad go léir. Sa cháipéis seo, insítear do dhaoine conas atá Rehab ag iarraidh ár gcuid oibre a dhéanamh.

Ár Misean

Is ionann Misean Rehab agus na rudaí atá Rehab ag iarraidh a bhaint amach. Seo thíos liosta de na rudaí sin:

- Cabhrú le daoine a bheith níos neamhspleáiche
- Cabhrú le daoine a bheith gníomhach ina bpobail féin
- Cabhrú le daoine a gcuid scileanna agus féinmhuiníne a fhorbairt chun go mbeidh siad in ann jabanna a fháil agus a choinneáil
- Cabhrú le daoine smacht a bheith acu ar a sláinte féin.

Ár gCuspóirí

Tá cúig cinn de chuspóirí ag Rehab agus tá plean cuimsitheach á réiteach againn chun iad a bhaint amach. Seo iad na cúig chuspóir sin:

1. Oibreoidimid go héifeachtach chun cabhrú le daoine a gcuid aidhmeanna a bhaint amach. Beimid cúramach le hairgead agus caithfidimid go críonna é. Cuirfidimid daoine ar an eolas faoinár gcuid oibre agus faoin leagan amach atá ar an eagraíocht.
2. Oibreoidh Rehab le gach uile dhuine a úsáideann ár gcuid seirbhísí chun cabhrú leo a gcuspóirí féin a bhaint amach agus saol neamhspleách a chaitheamh.
3. Cabhróidh Rehab leis na daoine a dtugaimid tacaíocht dóibh chun go dtabharfar cluas le héisteacht dóibh. Seasfaidh Rehab an fód ar son cearta daoine atá faoi mhíchumas.
4. Bainfidh Rehab triail as smaointe nua agus as modhanna oibre nua. Fiosróimid conas is féidir linn cabhrú lenár gcuid oibrithe barr feabhais a bhaint amach.

5. Oibreoidh foireann Rehab i ndlúthpháirt lena chéile d'fhonn ár gcuid seirbhísí a sholáthar de réir an chaighdeáin is airde.

Cuireann Rehab seirbhísí de chineálacha éagsúla ar fáil do na mílte duine in aghaidh na bliana. Ina measc sin tá cóiríocht le tacaíocht, oiliúint, tacaíocht pobail agus tacaíocht fostaíochta. Is mian linn go mbeadh níos mó roghanna ag daoine maidir leis na cineálacha seirbhíse a thugtar dóibh.

Cuirfear an plean seo i bhfeidhm i gcaitheamh na gcúig bliana amach romhainn. Thar an tréimhse cúig bliana sin, beidh roinnt athruithe ar na rudaí is mian linn a dhéanamh. Ach ní dhéanfar athrú ar bith ar na jabanna a dhéanann daoine gan dul i gcomhairle leo roimh ré.